

## UniSZA ada garis panduan ketat jemput, lantik profesor pelawat

Oleh [Zatul Iffah Zolkipli](#) - April 28, 2024 @ 1:44pm  
[zatuliffah@bh.com.my](mailto:zatuliffah@bh.com.my)



Naib Canselor Universiti Sultan Zainal Abidin (UniSZA) Prof Datuk Dr Fadzli Adam. - Foto NSTP/ihsan UniSZA

KUALA TERENGGANU: Universiti Sultan Zainal Abidin (UniSZA) mempunyai garis panduan ketat dalam menentukan profesor pelawat yang dilantik atau dijemput ke institusi itu menepati syarat dan kriteria ditetapkan.

Naib Canselor UniSZA, Prof Datuk Dr Fadzli Adam, berkata langkah itu bagi mengelak jemputan atau lantikan ahli akademik berstatus sederhana (mediocre scholar) terutamanya dari luar negara.

"Antara garis panduan ditetapkan adalah calon mestilah seorang pakar bidang dan boleh menjalankan semua 'Terms of Reference' yang diberikan.

"Selain itu, berkaitan semakan latar belakang calon profesor pelawat dari luar negara, saya yakin setiap universiti awam mempunyai garis panduan yang menjadi panduan lantikan atau jemputan.

"UniSZA juga mempunyai garis panduan berkaitan perlantikan profesor pelawat sama ada dari dalam atau luar negara," katanya ketika dihubungi.

Ketika ditanya keperluan mewujudkan satu prosedur operasi standard (SOP) khusus termasuk kewajipan menyemak latar belakang pensyarah dengan agensi berkaitan terutama Jabatan Imigresen dan Jabatan Kemajuan Islam Malaysia (JAKIM), Fadzli menyifatkan ia satu langkah proaktif bagi memastikan mereka yang diundang atau dilantik tidak terbabat dengan kontroversi.

"Bagi saya, ia satu langkah proaktif juga sekiranya semakan tambahan dibuat melalui Wisma Putra sekiranya membabitkan pelantikan dari luar negara bagi mengelak sebarang isu berbangkit timbul," katanya.

Terdahulu, Perdana Menteri, Datuk Seri Anwar Ibrahim dilaporkan berkata, pihak universiti seharusnya tidak mengundang pensyarah berkualiti rendah sebagai pensyarah pelawat.

Perdana Menteri berkata demikian sebagai mengulas kontroversi dibuat seorang profesor dipercayai pro-Israel, Dr Bruce Gilley, ketika tampil sebagai penceramah jemputan Universiti Malaya (UM) baru-baru ini.